

AFRIKA BORWA E KGETHILWE HO BA MODULASETULO E MOTJHA WA TAX ADMINISTRATION FORUM (ATAF)

06 Tshitwe 2024, Kigali — Afrika Borwa, jwalokaha e emetswe ke Khomishenara Edward Kieswetter, e kgethilwe ntle le ho ba le motho ya kgahlano le seo ho ba Modulasetulo e motjha wa Lekgotla la ATAF bakeng sa nako ya dilemo tse pedi Sebokeng sa Kakaretso sa 8 sa ATAF se neng se tshwaretse mane Kigali, Rwanda ka la 4 Tshitwe 2024. Ho tshehetsa maikemisetso a mawala a SARS a toboketsang tlhokeho le bohlokwa ba ho sebetsa mmoho le bakgathatema ho ntlafatsa tikoloho ya tsa lekgetho - lapeng mona, lebatoweng le matjhabeng.

Foramo ena ke moifo o itlhommeng pele mona kontinenteng ya Afrika oo thomo ya ona e leng ho aha taolo ya tsa lekgetho e sebetsang ka ho phethahala, mme seo se ntlafatse ntshetsopele ya ikonomi ya lehae, mme hwa bohlokwahadi, le ho ntlafatsa maemo a bophelo a batho ba Afrika. Lekgotla la ATAF le fana ka boetapele le tsela e mawala mosebetsing wa ATAF eo yona e sebeletsang bolaodi bohle ba pokello ya makgetho mona Afrika.

Tshusumetso ya ATAF e bonahala tlalehong ya morao tjena ya Bongodi ba Phethahatso e tekilweng pela Seboka sa Kakaretso e boletseng hore ATAF e rupelletse bahlanka ba lekgetho ba 3,242 ho tswa dinaheng tse mashome a mane le bosupa ka 2023-2024. Hodima moo, ATAF e bile le seabo pokellong ya makgetho a tjhelete e kana ka 702 million USD eo ka mohlomong e neng e ka be e sa bokellwa ntle le thuso ya mananeo ao e fanang ka ona dinaheng tseo e leng ditho.

Afrika Borwa haesale e na le dikamano tsa nako e telele le ATAF, yona e kile ya sikara Bongodi ba nakwana ka mora ho thehwa ha yona ka 2009, mme haesale e le naha e sikereng mokgatlo ona hoba e be mokgatlo o ikemetseng ka botlalo wa matjhaba. Mabapi le ho kgethwa ha Afrika Borwa, Khomishenara Kieswetter o thabetse tshepo eo ditho eo di e behileng hodima Afrika Borwa ka boikokobetso hore e be yona e etellang mokgatlo ona pele mme a tiisetse boitlamo ba Afrika Borwa ba ho netefatsa hore ka mehla mokgatlo o sebeletsa ditabatabelo tsa ditho tsa ona. “Afrika Borwa e kotsomala setulong sena ho tlisa boiphihlelo ba yona bo mabapi le ho tliswa ha diphetoho ho bapa le leeto la yona ha e ntse e tswela pele leetong la yona la ho

aha SARS e bohlale ya sejwalejwale eo botshepehi ba yona bo sa belaelweng, e tlang ho hlomphuwa le ho tlotlwa ke bohle.”

Ho kgethwa hona ha Afrika Borwa ho tla ka nako eo naha ena e nkileng Bopresidente ba G20 moo e itlammeng ho netefatsa hore Tshebediso ya Mehlopi ya Lehae e ba tabakgolo lenanetsamaisong la G20 le matjhabeng mme mehlopi ena ke karolo ya bohlokwa ebang dinaha di tla fihlella Maikemisetso a Ntshetsopele ya Nako e Telele. Ena e boela e le nako e bohlokwa ka ha ATAF e ntse e matlafatsa tshehetso ya yona ho Kopano ya Afrika mmoho le ho ditho tsa Sehlopha sa Afrika mane dipuisanong tsa Matjhaba aKopaneng (UN) tse mabapi le Moralo wa Tshebetso wa UN o tobileng tshebedisano ya lefatshe ka bophara ho tsa lekgetho, eo sepheo sa yona e leng ho netefatsa hore bohle ba akaretswa ho tse mabapi le lekgetho la matjhaba ha ka lehlakoreng le leng ho ntse ho hlokometswe le ho ntlafatswa dikgatelopele tsa setekgenike tse entsweng ho ntshetsa pele le ho phethahatsa Moralo wa tshebetso o akaretsang bohle wa *BEPS*.

Ho kgethwa hona ho tiisa le ho ananela maemo a Afrika Borwa Lefatsheng la tsa Lekgetho le Bolaodi ba Meedi, mme sena se latela boetapele ba Khomishenara Kieswetter ba WCO le ba ho ba Motlatsamodulasetulo wa *OECD Forum for Tax Administrations*.

Ho fumana lesedi le fetang lena, ka kopo ikopanye le SARS ka SARSMedia@sars.gov.za